

# Da Trun a Zuoz

L'organisaziun dal segund Festival da la chanzun rumantscha è lantschada

DA DAVID TRUTTMANN/FMR

■ **En dus onns, la stad 2022, ha lieu a Zuoz la segunda ediziun dal Festival da la chanzun rumantscha. L'organisaziun da quell'occorrenza ha gia entschet e la concorrenza da cumposiziuns è vegnida scritta ora quests dis.** Il mars da l'onn passà ha gi lieu a Trun, davant grond publicum, l'emprim Festival da la chanzun rumantscha. Trais onns pli tard, dals 01-03 da fanadur 2022, datti la cuntinuaziun a Zuoz.

Entant ch'il festival a Trun aveva in «accent» pli ferm sursilvan, duess en spezial il chant ladin esser en il center da la segunda ediziun. Dapi la primavaira da quest onn è in comité ladin vi da preparar ed organisar il festival. Commembers da quel comité èn *Curdin Linsel* (president), *Arno Felix* e *Jachen Prevost*. Il program da grob dals trais dis da festival stat gia. Tranter auter èn previs concerts e chant sin las plazzas a Zuoz ed ina concorrenza da cumposiziuns, analog a quella a Trun.

Quella concorrenza da cumposiziuns han ils organisateurs lantschà quests dis. Els han scrit ora la concorrenza e mess a disposiziun texts rumantschs da tut ils idioms – per metter quels texts en melodia. Ina cundiziun principala è che las cumposiziuns na dastgan betg esser memia pretensiusas, perquai che la concorrenza na dastgia a la fin «betg esser elitara», sco ch'ils organisateurs scrivan. La FMR ha fatg quatter dumondas al president dal comité d'organisaziun, a Curdin Linsel.

**FMR: Tar la segunda ediziun dal Festival da la chanzun rumantscha vulais vos metter il «chant ladin» en il center. Però tge èn insumma ils tratgs characteristics da quel «chant ladin»?**

**Curdin Linsel:** Cun il chant ladin è simplamain manegiada la chanzun engiadinaisa, v.d. chanzuns en lingua valadra e putera. Damai in access sur la lingua, quai ch'è gea atgnamain era l'element distinctiv principal da la chanzun rumantscha. Perquai mettain



**L'emprima ediziun dal Festival da la chanzun rumantscha a Trun è stada in success. Era la segunda ediziun en Engiadina vul dar in palc spezial al chant da chors d'uffants.**

FOTO WWW.CHANZUNRUMANTSCHA.CH

nus era a disposiziun per la concorrenza da cumposiziuns divers texts da poetessas e poets ladins. Nus vulain damai duvrair nossa lingua en il chant e mobilisar cumponists che scrivan chanzuns tenor tals texts. Ma sa chapescha èn era bainvisas cumposiziuns en auters idioms ed en rg.

**L'emprima ediziun dal festival a Trun ha gi bun resun e bler publicum. Vos avais damai in exempel per morder ora ils dents en dus onns?**

Il fil cotschen a Zuoz duai esser sco era gia a Trun la promoziun dal chant per uffants e la promoziun da cumposiziuns novas. Nus vulain dar a quels in palc, dar in'attenziun speziala a quels paucs chors ch'i dat. I va damai per promover. Quai vala era per il segund aspect dal festival, la concorrenza da cumposiziuns. Nus n'ans vesain betg sco concorrenza da Trun, mabain sco ina cuntinuaziun. Nus ans stentain dad organisar la segund'ediziun tenor nossas circumstanzas e pussaivladads.



«Nus na vulain naginas cumposiziuns acrobaticas.»

Curdin Linsel, president comité d'organisaziun

**Tar la concorrenza da cumposiziuns è ina premissa che las chanzuns na dastgan betg esser memia pretensiusas. N'èn ils chantadurs e chors rumantschs betg buns avunda?**

Na, na. Gia a Trun era ina cundiziun che las chanzuns na dastgan betg esser memia pretensiusas. L'idea è che nus avain silsenter cumposiziuns duvrablas per uschè blers chors sco pussaivel. Nus na vulain naginas cumposiziuns acrobaticas, mabain da quellas ch'èn forsa dad udir alura en ils concerts annuals da noss chors.

**Vossas preparativas per il festival han gia entschet. Tge è il proxim grond baccun?**

L'entschatta è fatga. Nus avain mess a strada diversas chaussas. Il proxim baccun è segir da fixar definitivamain il program da quella fin d'emna, probabel sin quest enviern. Ma era là stuain nus lavurar tenor il princip «bocca che voust – vainter che poust», damai guardar tge ch'è pussaivel finanziaimain ed organisatoricamain.

La pagina dal Festival da la chanzun rumantscha: [www.chanzunrumantscha.ch](http://www.chanzunrumantscha.ch)